

Na osnovu čl. 6. i 8. Stav 2. Zakona o komunalnim djelatnostima ( "Službene novine Kantona Sarajevo", broj: 14/16, 43/16, 10/17- ispr., 19/17,20/18 i 22/19), čl. 9. Stav 1. i Stav 5. Zakona o lokalnoj samoupravi ("Službene novine Kantona Sarajevo", broj: 22/00 Prečišćeni tekst), čl. 70. Stav 1.tačka 2 . Statuta Općine Vogošća ("Službene novine Kantona Sarajevo", broj: 27/14-Prečišćeni tekst, 14/15, 9/20 i 23/24) , Općinsko vijeće Vogošća, na redovnoj sjedinici održanoj dana 29.05. 2025. godine, donijelo je

## **ODLUKU O SJEČI I POTKRESIVANJU STABALA NA PODRUČJU OPĆINE VOGOŠĆA**

### **Član 1. (Predmet Odluke)**

Ovom Odlukom se regulišu uvjeti i postupak sječe i potkresivanja stabala na javnim površinama na području općine Vogošća, a izuzetno i na zemljištu u privatnom vlasništvu i ostalim površinama, ako stablo ugrožava život i zdravlje ljudi, instalacije komunalne infrastrukture, stabilnost i bezbjednost okolnih objekata i bezbjednost saobraćaja.

### **Član 2. (Značenje pojedinih pojmova)**

- 1) Javne površine i javne zelene površine utvrđene su propisima Kantona Sarajevo kojima je utvrđen i način održavanja komunalne čistoće na tim površinama od strane pravnih lica koji obavljaju poslove komunalne čistoće.
- 2) Privatne i ostale površine, u smislu odredbi ove Odluke, podrazumijevaju površine koje nisu određene kao javne površine, a dostupne su većem broju građana, kao što su izgrađene i uređene saobraćajne i zelene površine unutar i između blokova zgrada, između zgrada, kao i zemljišta i prostori uz javne površine, a koje su u vlasništvu pravnih i fizičkih lica.
- 3) Privatne i ostale površine održavaju i uređuju vlasnici odnosno korisnici tih površina.

### **Član 3. (Odobrenje)**

Sječa i potkresivanje stabala vrši se na osnovu odobrenja koje donosi Općinski načelnik putem Službe za investicije i komunalne poslove.

### **Član 4. (Razlozi za odobrenje)**

Sječa stabala odobrit će se :

1. Ako je stablo prestalo sa vegetacijom,
2. Ako postoji opasnost od pada stabla,
3. Ako stablo ugrožava život i zdravlje ljudi, instalacije komunalne infrastrukture, te stabilnost okolnih objekata,
4. Ako se stablo nalazi na lokaciji za koju je izdato odobrenje za građenje,
5. Ako ugrožava bezbjednost i preglednost saobraćaja.

Potkresivanje stabala odobrit će se:

1. Ako je stablo djelimično prestalo sa vegetacijom,
2. Ako stablo svojim rastom utiče na uvjete života i rada ljudi i okolnih objekata,
3. Ako stablo ugrožava i oštećuje okolne objekte i instalacije komunalne infrastrukture,
4. Ako ugrožava bezbjednost i preglednost saobraćaja.

Ukoliko se radi o stablu koje zbog svog položaja (stabla u obuhvatu zaštićenih površina), vrste stabla ili drugih razloga predstavlja hortikulturalnu i biološku vrijednost, odobrenje za sječu i potkresivanje donosi se po prethodno pribavljenom mišljenju Kantonalnog zavoda za zaštitu kulturno – historijskog i prirodnog naslijeđa.

#### **Član 5. (Komisija)**

Općinski načelnik rješenjem imenuje komisiju koja daje stručni nalaz u svakom pojedinačnom slučaju.

Komisija broji 3 (tri) člana, a u sastav komisije imenuju se diplomirani inženjer arhitekture, diplomirani inženjer poljoprivrede, diplomirani inženjer šumarstva i bachelor hortikulture.

Član komisije iz oblasti šumarstva je predstavnik KJKP "Park" d.o.o. Sarajevo.

Troškove postupka izlaska komisije plaća podnosilac zahtjeva, odnosno vlasnik ili korisnik zemljišta na kojem se stablo nalazi, investitor novog objekta, upravitelj zgrade, ili zainteresovano lice, u iznosu od 12 KM na žiro račun Općine Vogošća.

#### **Član 6. (Podnošenje zahtjeva)**

Zahtjev za sječu i potkresivanje stabala može podnijeti vlasnik ili korisnik zemljišta na kojem se stablo nalazi, investitor novog objekta, upravitelj zgrade, Savjet mjesne zajednice ili zainteresovano lice.

Zahtjev za sječu i potkresivanje stabala može pokrenuti i općinski organ uprave nadležan za komunalne poslove, po službenoj dužnosti.

#### **Član 7. (Potrebna dokumentacija)**

Uz zahtjev za izdavanje odobrenja za sječu i potkresivanje stabala prilaže se kopija katastarskog plana sa označenim mjestom na kojem se stablo nalazi, a ukoliko se radi o sječi ili potkresivanju stabala radi izgradnje novog objekta, onda se uz zahtjev prilaže i odobrenje za građenje.

Ukoliko se radi o sječi stabala, nadležna Služba je dužna obavijestiti mjesnu zajednicu na čijoj teritoriji se nalazi predmetno stablo o donošenju rješenja u roku od 7 dana od dana donošenja rješenja.

#### **Član 8. (Obaveza održavanja)**

Održavanje stabala u obavezi je :

1. Vlasnika ili korisnika gradskog građevinskog zemljišta na kojem se stablo nalazi,
2. Vlasnika ili korisnika privatnog zemljišta na kojem se stablo nalazi,
3. Upravitelja zgrade ukoliko se radi o stablu koje se nalazi u okućnici objekta kolektivnog stanovanja,
4. Komunalnog preduzeća na površinama utvrđenim Uredbom o uređivanju i održavanju zelenih i rekreativnih površina u Kantonu Sarajevo ("Službene novine Kantona Sarajevo", broj: 22/16).

#### **Član 9. (Troškovi sječe i potkresivanja stabala)**

Troškove sječe i potkresivanja stabala snosi vlasnik ili korisnik zemljišta na kojem se stablo nalazi, investitor novog objekta, upravitelj zgrade, odnosno komunalno preduzeće u čijoj je nadležnosti održavanje stabala.

**Član 10.**  
**(Sječa i potkresivanje stabala koje se ne nalaze na javnoj površini)**

- 1) Na zahtjev zainteresovanog lica ili po službenoj dužnosti, općinski organ uprave nadležan za komunalne poslove rješenjem može naložiti vlasniku ili korisniku zemljišta da o vlastitom trošku izvrši sječu i/ili potkresivanje stabala, ukoliko je ispunjen bilo koji od uslova iz člana 4. ove Odluke.
- 2) Vlasnik ili korisnik zemljišta, a čije zemljište graniči sa javnim zelenim i javnim saobraćajnim površinama, kao i sa susjednim privatnim površinama, dužan je redovno održavati stabla, nisko rastinje, vrtove, voćnjake, ograde od ukrasne živice i ostalo što bi moglo ugrožavati živote i zdravlje ljudi, instalacije komunalne i putne infrastrukture, bezbjednost i preglednost saobraćaja, stabilnost okolnih objekata.

Ukoliko vlasnik ili korisnik zemljišta ne postupi po donesenom rješenju u roku od 30 dana od dana donošenja rješenja, sječa i/ili potkresivanje stabala izvršiće se o trošku vlasnika ili korisnika građevinskog zemljišta putem nadležnog komunalnog preduzeća, a po nalogu nadležne komunalne inspekcije općinskog organa uprave.

**Član 11.**  
**(Sječa stabla zbog gradnje objekta ili instalacija)**

Ukoliko je zbog izgradnje novog objekta ili postavljanja instalacija neophodno uklanjanje stabala, investitor objekta odnosno instalacija snosi troškove sječe o svom trošku.

Investitor objekta odnosno instalacija dužan je o svom trošku izvršiti sadnju novih stabala uz saglasnost Službe za investicije i komunalne poslove, a na mjestu koje odredi nadležno komunalno preduzeće.

**Član 12.**  
**(Nadzor)**

Inspekcijski nadzor nad provođenjem odredaba ove Odluke vrši nadležna komunalna inspekcija.

**Član 13.**  
**(Zabranjene radnje)**

Zabranjeno je vršiti sječu i potkresivanje stabala na javnim i javnim zelenim površinama bez odobrenja nadležnog općinskog organa.

**Član 14.**  
**(Kazne za prekršaje pravnih lica, odgovornih lica u pravnom licu i samostalnih privrednika)**

- 1) Novčanom kaznom u iznosu od 1.000,00 KM do 5.000,00 KM kaznit će se za prekršaj pravno lice, a u iznosu od 300,00 KM do 1.500,00 KM odgovorno lice u pravnom licu, ako postupi suprotno odredbama člana 13. ove Odluke.
- 2) Za prekršaje utvrđene u stavu 1. ovog člana, kaznit će se svako fizičko lice koje samostalno obavlja djelatnost novčanom kaznom u iznosu od 300,00 KM do 2.000,00 KM.

**Član 15.**  
**(Kazne za prekršaje fizičkih lica)**

Novčanom kaznom od 200,00 KM do 1.500,00 KM kaznit će se za prekršaj fizičko lice koje u predviđenom roku ne postupi u skladu sa članom 10. ove Odluke, kao i fizičko lice, roditelj ili staratelj malodobnog djeteta ako postupe odredbama člana 13. ove Odluke.

**Član 16.**  
**(Započeti postupci)**

Ako je do stupanja na snagu ove Odluke upravni postupak pokrenut kod nadležnog organa, a nije doneseno pravosnažno rješenje ili je rješenje poništeno i vraćeno prvostepenom organu na ponovni postupak, postupak će se nastaviti po odredbama ove Odluke.

**Član 17.**  
**(Stavljanje propisa van snage)**

Stupanjem na snagu ove Odluke prestaje da važi Odluka o sječi i potkresivanju stabala na području općine Vogošća ("Službene novine Kantona Sarajevo", broj: 02/10).

**Član 17.**  
**(Stupanje na snagu i objavljivanje)**

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

Broj: 01-02-1096/25  
Vogošća, 29.05.2025. godine



PREDSJEDAVAJUĆI  
OPĆINSKOG VIJEĆA VOGOŠĆA

*Nihad Hadžić*

**Nihad Hadžić**